

摘藻堂四庫全書薈要

集部

欽定四庫全書薈要

集部

石田文集卷一

臣董誥詳校  
詳校官助教臣謝登雋



欽定四庫全書薈要

石田文集目錄

卷一

五言古詩

卷二

七言古詩  
五言律詩

卷三

七言律詩



卷四

五言絕句 七言絕句

卷五

樂府歌行 雜言 聯句 騷 賦

卷六

制詔 表牋 青詞 祝文

卷七

章疏



卷八

銘  
箴  
贊  
雜文  
策問  
題跋  
記

卷九

序

卷十

碑誌

卷十一

碑誌

卷十二

碑誌

卷十三

碑誌

卷十四

碑誌

卷十五

行狀  
傳  
附錄

臣等謹案石田集十五卷元馬祖常撰前五卷載詩歌騷賦後十卷則制詔表牋箴贊章疏序記銘誌諸體也祖常字伯庸光州人延祐初廷試第二人應奉翰林文字累官樞密副使謚文貞祖常為文章精贍閎麗一洗柔曼卑冗之習而振之以氣骨故當時能文之士極推服之集中詩如都門壯遊諸作長篇巨製迴薄奔騰不受羈勒其才尤不可及陳

旅嘗稱其古詩似漢魏律句入盛唐散語得  
西漢之體聞者皆以為定評焉至元間蘇天  
爵既選其詩二十首文二十首入元文類又  
請於朝刊行其集而自為之序其云石田者  
以祖常所居石田山房名之也乾隆四十三  
年四月恭校上

總纂官臣紀昀陸錫熊臣孫士毅

總校官臣陸費墀

石田文集原序

故御史中丞馬公諱祖常字伯庸系出西裔延祐初設  
科舉以兩榜取士公應河南鄉貢及會試俱冠右榜時  
已稱公有文學初非以高科致儒名公志氣修潔而筆  
力尤精諂務刮除近代南北文士習氣追慕古作者與  
姚文公燧元文敏公明善實相繼後先故其文詞簡而  
有法麗而有章卓然成家其在禮部為尚書在中書為  
叅議在御史臺為治書侍御史中丞在樞密為副使累

階要官自奉清約讀書刻厲如始學者雖一話言不苟  
及以病歸終於家大夫士之聞者無不悼惜嗚呼篆鐘  
編磬淡乎其韻璫珎盪琤栗然其光質古而文益奇以  
之攷律呂之和資佩服之華皆用於宗廟朝廷之上者  
也詩曰惟其有之是以似之公實有而似焉公之家世  
勛閥具國史及墓碑太原王守誠與趙郡蘓天爵在游  
從中感知尤多為序其文集至元五年己卯九月丁巳  
中議大夫御史臺都事王守誠序

昔者仁宗皇帝臨御天下慨然憫習俗之弊於文法思得  
儒臣以圖治功詔興貢舉網羅英彥故御史中丞馬公  
首應是選入翰林為應奉文字與會稽袁公蜀郡虞公  
東平王公以學問相淬礪更唱迭和金石相宣而文日  
益奇矣未幾擢拜御史劾權貴人擅弄威福遂罷相位  
久之其人再竊政柄左遷公尹縣開平實欲深中傷之  
公退耕浮光之野泊然不以介意權貴人死復入翰林  
為待制遷直學士訓誥誓命溫厚典則有西漢風在禮

部為尚書兩司貢舉選士專求碩學崇雅黜浮至順天子親見郊廟裸獻禮文多公裁定及為臺臣端重正大百辟鎮肅議論廊廟有關於治體一時薦拔皆重厚清慎之士公少嗜學非三代兩漢之書不讀文則富麗而有法新奇而不鑿詩則接武隋唐上追漢魏後生爭慕效之文章為之一變公之先出永古特部世居天山迨入中國數世宦學不絕至公位益光顯嗚呼我國家龍奮朔土四方豪傑咸起而為之用百戰始一函夏干戈



既輯治化斯興而勛臣世族之裔皆知學乎詩書六藝  
之文以求盡夫修身事親致君澤民之術是以列聖立  
極屢降德音興崇庠序敦延師儒非徒為美觀也至於  
仁皇始欲丕變其俗以文化成天下猗歟盛哉觀公治  
行卓偉若此則祖宗取材作人之效豈第文辭之工而  
已雖然非此無以表公之蘊公既沒其從弟察院掾易  
朔出公詩文若干篇合天爵所藏共若干卷請於中臺  
刊諸維揚郡學嗚呼覽者尚能攷公之行也夫及識愚

之悲也夫至元五年己卯冬十一月朔嘉議大夫江北  
淮東道肅政廉訪使趙郡蘇天爵謹序

文章何與乎天地之運哉元化之幹流神氣之推盪凡  
以之而生者則亦以之而盛衰焉吾嘗觀於禮與樂矣  
升降揖讓周旋裼襲之容屈伸俯仰綴兆繁瘠廉肉之  
節文之著也而樂由天作禮以地制禮樂不曰天地之  
文乎昔者聖人之以禮樂為天下也治與運會文從而  
生焉世之為文章者蓋亦有出於此而已矣漢唐之治

不及三代遠甚而其人之述作乃或有治古之風者亦  
幸而際夫天地之運之盛也趙宋鉅儒載道之書與歐  
曾王蘓數子之文君子於是有所徵矣而其運往治弛  
則凡以文鳴者皆靡然若緒風之泛弱卉也我國家龍  
起朔漠運符羲軒淳龐雅大之風於變四海士大夫爭  
自奮厲洗濯舊習至仁宗時遂以科目取天下之士而  
用之浚儀馬公伯庸裒然以古文擢上第聲光煜如清  
河元文敏公謂其所作可以被箎弦薦郊廟天馬寶鼎

諸作殆未之能優也公早歲吐辭即不類近世人語言  
古詩似漢魏律句入盛唐散語得西漢之體嘗謂人學  
詩文固貴有師授至於高古奇妙要必有得於天吾未  
嘗有所授而為之計所嘗師者往往為近世人語言吾  
故自知吾之所為者非繇有所授而然也蓋公以英特  
之資而涵毓於熙洽之世自決科以來踐駁清華至為  
御史中丞其所際者盛矣則其文章又豈繇有所授而  
然哉國家且益崇禮樂以對天地之景運能言之士幸

而際乎斯時則其所著當益有可觀者而美盛德之形容以昭天地之至文則亦有賴於若人之為者而公不可作矣淮東憲使趙郡蘇伯修甫彙公文藁若干卷將鋟梓以行於世適旅至廣陵乃使綴一言於編端伯修在成均時公以監察御史試國子生得其所試碣石賦嗟賞不置伯修以學行政事致位通顯非徒以文知名獨不能忘昔之嘗知己者風誼之篤可以愧澆俗矣旅光州人而生於甌粵延祐中公以襍事入閩歸而告諸

朝之公卿大夫士曰閩中有陳旅者可與言文事也則公亦旅之知己者矣追念曩日與公晤言至夜分不休約他日還浮光為我結屋並石田山房暮年數往來相歡今則不然乃執筆序公遺文於空江落木之間俯仰人世不知涕泗之橫流也應奉翰林文字從仕郎同知制誥兼國史院編修官陳旅序

欽定四庫全書薈要卷一萬六千二百九十六

集部

石田文集卷一

元 馬祖常 撰

五言古詩

都門一百韻用韓文公會合聯句詩韻

詩中有三字非元韻蓋祖常荒學不能  
用古韻故也延祐五年八月作

返躬操耒耜奉身寡帷幙田居水春磴城宿霜鳴柝凝  
塵尚沉冥幽賞任飄泊行歌鮮同歡起舞真獨作嘯咏  
氣頗雄攀躋力或弱樛木植幢蔭醜石掀獸惡心恥婦

女仁志薄游俠諾校書揚雄官入粟卜式爵娛情愜禽

弄失意被蜂蠱佩履侍殿陛觚牘宴館閣傭童飼棧駒

賤婢占屋鵲上書願封禪監祠議嘗酌紅瓔綴花房碧

刺胃藁薄春旗天仗浮秋駕星河涸補袞予何能懷祿

我所作英名襲蓮炬貴籍謝魚鑰造謁每赧然循默譬

沃若壁蝸涎篆歌穴蟻戰壘却組繡紅縷連罨畫翠色

著卿雲帟邑屋瑞雪塗郭郭群儒修麟經諸將宣豹畧

請劍斬樓蘭傳檄喻印笮賈區紫貝繁酒爐銀甕鑠潑



刺鱸翻砧郭索蟬就縛水戲鬪魚龍山兔獻熊羆奇服  
燕姬姹獠語滇童愕東郊買鬪雞西市賣馴鶴宛宛綠  
項鳳濯濯紅頭雀豪僧佛宗開大巫鬼物託迎祥有時  
和驅厲無旱虐漕粟大庾盈賦結崇齋錯圈虎割肉喂  
鞬鷹搏禽嚼荔丹貢甌閩橘顆苞沔鄂能賦皆鄒枚飛  
翰盡盧駱未央曲呆愚長揚市羽繳閒棋遇笑仙雜劇  
坐忘瘡飲飛頭虎毛刑官面瓜削朝儀徵魯生廟敲賓  
商恪天池漾文波海島通潛壑婦功春蠶溢穡事秋田

獲器羨鏤桐梓冶良鑄錢鑄街越布虛陰觀闕翔寥廓  
治廷播訓敕清邊禁剽掠窮髮炙馳蹄勾麗醢熊脚詰  
奸鉏大猾恤隱發深瘼靈圃白獸游禁籞黃鵠落時方  
追治古事乃繼疇昨巢櫓尚羊裘華門仍葦箔周封表  
鎮望禹畫首河洛聲名惜馬纓音律辨牛鐸郎署紆銀  
艾王邸施丹艘轍浚千車馳塵坌萬馬躍碣石入渤澥  
太行分嶺募士女工鞏絲王孫帶河橐清明日月懸統  
正宇宙拓分行下觀風立聽上宣噩服官綺纚屬虞衡

輶旁魄牖贖澤國乳漣給沙漠木禾神所食石蜜刀  
乃斫天樞夾杓垣日畿絡雄莫鼎豈以金鑄山豈以銅  
鑿戴憑席重重周舍言諤諤錫宴屬在鎬咸秩亟祠霍  
造邦象邵室立法簡漢約吾生類鳬鷺賤跡雜兔貉囊  
書爛星芒匣劍瑩霜鏐雨耕耨頻耨月斲石或搏尋真  
養三芝求方問五藥傳奇存山經輿地指井絡悠悠秋  
剪菰晏晏春食藿親歡戲假面客至樂吹簫恃才頗優  
游使酒漸諧謔山深木敷榮野迥鶴寂寞擔簦踏槐黃

疊袂聯棣萼移官居旂常職領專錚鏘遮塵帽頂席隨  
俗屋蓋弱俸錢具道醢飲餒嘗骨膝孤危衆易傾獨立  
古難卓徒跣防毒蛇空拳困狂狃出弊季子裘入舍居  
士屬海運知化鵠泥蟠見屈踐門高譽荀龍才逸薦禰  
鷄逍遙投壺歌慷慨擲骰噓有興即騎行無疑豈龜灼  
俎豆觀揖讓賓介講獻酢風櫛李涵氷日幌櫻衰酪鄰  
饑馬通爨市醉羊屠醵耘德鈐礪刃稱藝弩引彊任情  
受世疵肆志探古博奏賦始中程諫獵終失度不念聲

恤緯已謂童舞勺寢興避彈射周折準規矍襍被丘中  
琴揚舲池上酌桐孫迸空枝竹穉穿石籜南翁日種漆  
北地日產柞蓄厚用不躋材衆工豈格甘泉祠猶清西  
河居乃索菁莪採衢謠湛露興徒弔帝仁載大興臣詩  
埒微爚史官詳纂記儲以掩甕粕

壯遊八十韻

十五讀古文二十舞劍器馳獵溱洧間已有丈夫氣裏  
糧上嵩高靈竒發天秘熒熒三秀芝為我擢繁翠空青

丹銀品伏龜鏤文貝駢羅星辰精附麗日月會紫鳳友  
朱鷺翩翩劇翔戲飛閣舒鳥翼懸泉瀉珠琲磨崖見古  
刻應是列仙記捫蘿欲登觀苔滑阻凌厲烟霞蒼蔚隳  
霧雨蕭颯至余時戴籜冠綠壁照縞袂檀欒有磐石真  
人每同憇北臨黃河水濁流觸天沸蛟龍逐鼉鼉鱗介  
滿水裔衝波崩金堤萬夫廢穡事官家憂其勞玉馬歲  
沉祭江淮畫鷁船夜上謠嘒嘒魚鹽不直錢寡婦豈拾  
穗釀酒相呼飲顛倒再拜跪中心忘嗔訶縱談詆漢魏

三十能歌詩鄙薄雕蟲技不肯學仕宦慷慨負高義持  
錢送酒家觴至即一醉羹芋餅谷筍飯煮山陽糝峨冠  
擬魯儒短衣真楚製遠行探禹穴六月剖丹荔巫峽與  
洞庭彷彿蒼梧帝三吳震澤區幼婦蛾眉細唱歌攪人  
心不可久留滯公淮達汶泗摩挲泰山礪聖鄉有亡書  
求道亦容易童子操觚牘價重麒麟屬京國天下雄豪  
英盡一世舞羽肅文教橐甲飾武脩馬跡見騰塵車轍  
聞戛轡輦騫天觀起鱗雜井屋綴千畝開靈潢馴象浴其

汭我皇拓文場群髦咸戰藝洎予黔婁生言辭罔締繪  
但幸晁董死收拾在等第臚傳下閭闔恩澤承滂沛春  
雲覆林塘雜花懸火齊詞垣正舒華吹竽獨無喙執筆  
御史府羞縮如牡蠣彈評則春秋齟齬失剗厠問俗西  
夏國驛過流沙地馬啣苜蓿根人衣駱駝毳雞鳴麥酒  
熟木枰薦乾薺浮圖天竺學焚尸取舍利安定昆夷居  
貪鄙何足貴返途歷邠岐原田表古畷宛宛陶穴民艱  
難謀樹藝驪山葬秦魄茂陵迷漢竈黍離悲故宮修竹



編清渭日入狐狸驕天陰蟬竦翳溫泉山津陽古瓦識  
唐字關河隔山東華岳秋更霽首陽餓夫薇霜露已憔悴  
鑄牛挽浮梁恍惚水所噬晉俗棗齒黃冀馬電蛇駛  
井陘阨坤維太行逼象緯煌煌日園近赫赫天人瑞田  
舍植汶篁郵亭擷吳桂優游逢化國俯仰詠樂歲豈用  
百二險自乃十一稅北都上時巡扈蹕浮雲騎宴鎬帳  
殿移拜洛周廬衛崑空山櫻繁川曲紅藥膩列障敕勒  
塞萬里靜烽燧九節菖蒲良貢筐充藥餌疇昔閉戶居

耽讀未見試三年不窺園自謂五經笥四十得俸祿僅  
可給美饍誰能薄淮陽不作鴻臚寺簡書畏懷歸孤矢  
示初志振鷺方擢質冥鴻忽垂翅感嘆對囊螢興言友  
荷蕢諒非廊廟具頗異市井輩當曳鄒陽裾願擁文侯  
簪

贈客

疊巘擢蒼蔚繁英粲紛葩銀繭霞已積翠幢栢方遮劇  
飲肆豪縱清談宴賓嘉呌嘯虎當嵒趨蹌鶴行沙聯蛾

聘趙女貫珠唱吳娃露庭汎蘭蓼風閨透窻紗魚泳文  
波圓禽翔喬雲斜逸樂諧金石清真况烟霞洗藥秋汲  
澗種秫春燒畝寓言託莊列潛心著義媧所貴丘園賁  
終然心匪遐

挽林彥栗秀才

女蘿附高松榮華凌衆草猗蘭困蕭艾顏色亦自好歎  
彼谷中人絲絢被纖縞生世固不諧埋銘宜有攷

舟中望鄒嶧山

魯雲偃車蓋汶水流魚鱗操舟返任濟川梁號通津東  
望鄒嶧山六丁鑿嶙峋靈崑溜泉乳仙遊道霞輶石髓  
若可食吾將託茲身

西方樂 二首

魯郊秋已深西樂多蒲魚日暮積靄重維舟月生初露  
涼水禽宿雨晴艷芙蓉擷花結楚佩宛若湘南居

又

東平西郭外船尾到籬根共嘆原田沒兼愁邑屋翻秋

寒雲亦雨天晚日初暄野市飢無米流離惜子孫

讀陶潛詩

伯夷恥粟餓屈原避讒死獨有柴桑翁一不失張弛所  
以百世下風流激頽靡遐觀八極表浮榮何足數

送袁伯長歸浙東

三首

龍角不如犀常不生馬廐麟趾不如牛終當在君囿我  
行泰山阿日觀望朝候見子被雲服家居夾靈鷲揖之  
不得近跂慕塵光後

玄圖詳鳥官丹經譜黃銀義媧鑿崆峒羅列大法陳尉  
矣夫子胸如天懸星辰英聲發為辭商盤襲周幽王官  
豈不衆虛席需儒臣安車行有名無弄越水春  
雞鳴戒僕御具食起就途僅取資給周豈謂車騎都行  
過青齊野忍見人逃逋翁姑累帶索跟脰無完膚即欲  
與盤飧但可飽一夫遲遲去國旌能得不疾驅

貢待制文修撰王都司同賦牡丹分得色字

名都擅穠華奇葩紛翕艷頰暈紅粉艷囊垂桂蠹蝕初

凝沆瀣水漸展蒲萄織仙綬曳雙環么鳳盤六翼粲粲  
春奩瑩晶晶風燈直可憐照容袖縹緲見顏色

齋宿太社署

五首

朱門屹南起金水經北流繚垣外旁達周屋內廣修圭  
玉承瑣藉碧鏤飾衣篝中壇土五色夏松露浮浮改容  
事明神豈謂茲淹留

明世容謏薄依光秩散署束帶揖上官攝衣奉神御泉  
冽器每滌芻香牲亦茹循壇習登降趨位就表著翼翼

清祀修濟濟百辟助願神錫茂祉農功相蕃庶賤臣捐  
俸稍牽犢耕雞曙

元宰職大工太史繹帝載庶官服攸司同寅承聖代赫  
奕旂常華議禮出藻繪齊宮熏沐居衣裳步鳴珮鞭撈  
吏牘急投足有彈劾乃知容臺貴終日俎豆內

齋宮蔚清華前榮盡方壺古礎石芙蓉日景射銅鋪嘉  
木蔭長夏階草宜露濡兵衛限囂雜簷網懸蜘蛛署書  
督案盛設吏視茅苴端居見博士希武循庭除



樂工奏宮懸登歌布護功祠官侍奠瘞靈軒下玄穹祝  
辭求善歲侑我禋與種種及人飢報祀百禮隆瑣瑣  
大社令樂職朝上公

古意

秋羅盡雙蝶涼颼透鮫綃攀紆翠襞積騰拏鳳盤翹公  
子高宴集水閣芙蓉搖來禽丹砂紅石蜜春冰消歡情  
光景洽壯意風雲飄所期國士知豈謂虞人招

苦寒  
五首

肅肅歲已晏列列冰霰集寒雲光不流槁木鳴日夕挾  
纊處南戶嚴稜坐相襲端然成離居企念穉陽復

褰裳居重戶驚飈蹈書帷穴地篝火持酒得冰漸杲  
杲日出光萬物待被施豈無陽和節歲序非爾私

納履非遙征堦戶豈寡交今茲祁寒候火井疑冰泡離  
人嘆無衣原獸淫弓消憂端坐耿耿雞鳴動嚶嚶

南戶日頗暄居獨意亦適觀物契妙道舍情想真識靜  
翳理雖殊造定趣乃一古人不可求茲焉寄游息

日精赫重光午景延冬暄真見煦物功始覺陽道尊玄  
冥斂時肅衣被元氣溫鼻端有消息守此觀化原

報春堂

青陽布仁德萬品含景滋人道貴有報天施終匪私遲  
遲春暉和寸草為生資聊觀孟氏咏載攷生民詩

古詩 三首

繾綣憂腸興觴至不能酌高飈揚塵沙倏倏滿戶竅冠  
履對孔經蠅亦集堂突淹留藉君子相與一晤嘯

弱馬不可御復爾路阻脩石子頭犖确馬足無所投馬  
足無所投顛隣臨道周何能乘黃鵠四海一日遊

凌晨視園蔬綠色承露英命婦自採摘終朝掬不盈持  
以充庖厨豈療飢腸鳴婆婆秋菰葉不受魚肉腥朝暾  
煦寒畦中心含素馨

淵明始末圖

盡史謝文字託意在粉繪高人蹈古道終造玄澹會涉  
世情豈真採菊心若寄持酒每自慰翁也得奇計載觀

始末圖悠悠似相契

錄囚大興府公廳書事

寒泉汲露井冰盤薦丹果晝永榴火繁風微筠粉墮雖  
欣景清麗復厭事褻瑣堦庭列群吏敲扑狴犴折獄  
乏才辯傷民困袒裸初余居田畝鉋鎛每親荷幽賞偕  
夙昔文字當宴坐諷詠弄毫素射獵削箭筈江介觀海  
濤河外陟嵩墮訪隱同壺觴問道辨介羸今也行作吏  
冠帶苦包裹翹首望南雲歸心逐東舸

擬古

崇臺拂繁雲阿閣蔭廣路上有彈琴女文采被烟霧玉  
食薦翠盤渴飲瑤草露鄙薄貧士妻終歲弄機杼

春寒 二首

叶風應青陽羲御南其翰生榮兆植物民氣趨和柔三  
農興歲功鉅鎔日以修云胡司寒神正月行斂收獵獵  
驚飈來壯士晝索裘冰梁阻沃漑龜拆橫大疇穡事忽  
愆時誰與飢餓謀得見吹律衍吾將迎道周

歲律啟璇室天家授人時嘉生達勾萌厚德宣靈祇玄  
功既旁被吾人亦咸宜曩在閉閤日商旅車不脂瑟縮  
謹蓋藏宛宛如蚌龜茲遇孟陬月遲日載景熹春酒續  
古意游子求履緼豈悅草木華所貴陽道施陽道一以  
施衆美俱無疵

春雲

高雲起城闕流離度庭樹依風拂迴塘波瀾光影注荒  
林帶疎烟照日亂縈縷婉孌連浮陽空明映淒霧嵐翠

舍玉暉景采滿晶璵

宜作璵

逍遙幽賞諧緬邈世娛阻

送衛大隱卜者

飲馬盧溝河水寒傷馬骨牧羊居庸關草短餓羊腹君  
行苦匆匆我且無握粟陟岡望高雲東南有黃鵠

送幼度御史南遊

辭官亦有道諧世亦有窮君子尚高義賤物不賤躬含  
情適夷曠潛心入玄中弓旌或南出求子江水東

田間



中田時柔桑周垣列苑柳居然成農耕林廬頗完好朋  
從時往過林頭出尊酒意氣每酣適仰視北有斗豈知  
念湘纍那復嘆嗟一作尼叟丈夫貴立志文字託永久

賦海月送彭君教授九江

江月照人近海月涵太清大地積微塵何能翳其明  
光儼陽耀陰魄獨含精况爾朝夕馳呼吸成虛盈持茲  
燭玄造萬類無遁情彭君忽起揖子以知言名

王維輞川別業詩圖

野水已不流野田已無腴日夕華子岡狐狸上丘陵高  
人茲為土盡墨飛塵凝空餘古韻語彷彿金石興

新歲丁卯二首

宣髮日已皓行年屬知非持身仕明時出入謹細瑣  
屑文墨賤藻飾供脂韋秩秩叙天經哺此萬齒饑枉已  
未敢進斯願豈終違

獻歲時序改真宰布陽和默默玄運交生物有駢羅天  
塗日宣光泮水渙文波豈樂具春服農祥願無訛

飲酒 六首

進士當盛明自謂非時才  
狂斐學文字無聖為我裁  
二者俱寡合終令智士咍  
斯旦已陽春對我聊持杯  
祖母在堂上小孫方稚孩  
俯仰見五世居生豈悠哉

簡編有重訛折衷無權衡  
黎庶有重困救藥無持平  
昔者賢聖出屯蹇躋其身  
躋身不躋道龍蛇果能伸  
棄置姑飲酒陶然會天真  
萬物各遂性雜沓向我陳

祖母九十七堂上受封恩  
小孫初一月哇哇弧矢門  
吾

生豈不遂知足心不煩在昔田里中學書不窺園隣舍  
或招飲怒不與之言矜持稱廉隅過往太守軒今茲遇  
明聖經幄寄討論啟沃資皇明古道因以存時日得賜  
酒獨酌還厭喧

考妣早棄我得祿不逮親幸茲有祖母九十康強身我  
情終不樂日思我親仁襁抱免水火少長俾知倫出入  
鄒魯俗用變宿習因植松在淮山稼田為齊民興念輒  
涕泣有酒亦逡巡

昔我七世上養馬洮河西六世徙天山日日聞鼓鼙金  
室狩河表我祖先群黎詩書百年澤濡翼豈梁鵜嘗觀  
漢建國再世有日磧後來興唐臣胄裔多羌氏春秋聖  
人法諸侯亂冠笄夷禮即夷之毫髮各有稽吾生賴陶  
化孔階力攀躋敷文佐時運爛爛應璧奎

嗟哉寡諧合蒼髮禿不齊觴至即飲爵猶恐逢訶詆衆  
人以儒進我不限吏資入官養交譽惟恐不合時含笑  
作雅咏遭罵亦詭隨出入踐華要譁諉成其私積階漸

崇貴剽獵章句辭鼓頰說古今證據稱云為斯世豈可  
誣小夫甘自欺興言發喟嘆飲者終不知

留別沂州張君仲

揚舲下彭城分颿上沂水與子作別離眷言重徙倚曩  
在京華居連室同井里出則馬轡聯入則衣袂比今也  
各散去相顧意未已我操田器歸子執州符仕慎勿輕  
此身期以善自止

觀耕者有言

庶矣新田殖疲民得無飢先輸公家賦又足食其私老  
父揖我語歲功實由茲勸農古有官助給牛種施今官  
亦勸農行田吏奔馳爾去告爾長我自安無為

禮部合化堂前後栽小松

三首

買松栽兩階綠髮已可梳恐是女元君截鬚生地腴遲  
爾千尺長下產黃琥珀服以安心神飛身作仙客  
樹色綠透戶畫景如歲長微風吹几帷硯池麝墨香分  
曹寡職業糜廩充鼠腸多因文史間陶然肆其狂

有屋山之陘有田水之滑如何又苟祿屈伸隨世人納  
履斯途征騁心斯失真興言每自悔願為耕鑿民

蔓草不除

大夏萬物長蔓草多華滋勾芒發苕穎苞實各及時賴  
爾有野意使我情悅怡誰云田中殖嘉谷亦如茲

六月七日至昌平賦養馬戶

馬足與石闢石齒齧馬足足跛背生瘡窵兀瘦見骨官  
家日有事陸續使者出使者貴臣子騎馳日逐轂驛吏



報馬斃鞭撻寡婦哭寡婦養馬戶前年夫死役占籍廣  
川郡有田種菽粟翁姑昔時在城邑復有屋連歲水兼  
旱洊飢罹不淑夫死翁姑亡田屋盡質鬻寡婦自養馬  
遠適鵬窩谷績紡無麻絲頭葆脰膚黑塞下藜莧小空  
釜煮水泣驛吏鞭買馬磨筭向山石安得天雨金馬壯  
口有食

寄六弟元德宰東鹿

我有六兄弟我長汝最幼我長守田廬汝幼侍親右跋

涉萬里途隨牒越閩岫親復當官清晝坐寘宴豆教汝  
讀詩書夙夜獵文囿不幸親棄予萬里汝扶柩汝兄元  
禮賢斬服攜汝走我自河淮南迎喪匍匐救號哭天不  
磨崩裂屢顛踣歸安桐鄉阡銘文手自鏤買石礱石儀  
一作古儀樹栢夾漢獸俯仰嘆存沒今茲霜露又汝今出作  
縣我偶尚書逵戒汝憶親教公田代耕耨汝素謹禮法  
口未見嗔詬更宜歌我詩無視我老謬憔悴傷民恫恚  
忿兩莫闕縣政書考功同去聽山溜

葆真觀納涼二首

虐旱熾初暑煩囂不可滌城隅有琳館松竹蔭午日呼  
我良朋來嘯咏各岸幘蕭然忘世慮相對坐盤石

淪茗滌塵襟煩暑亦可忘團團篋中扇復開明月光况  
此太清居林樾天風涼誰鑿河漢水為我雨八方

端午效六朝體

修篁發秀林新荷疊芳池采絲擷霧縷紗縠含風漪蕤  
賓應樂律端陽正歲時馥馥蘭湯浴艷艷蒲酒持漢宮

闢草戲楚船張水嬉江心鑄龍鏡好用照湘纍

移梅四首

幽屏逐魚鳥沉跡儔隱淪所欣在林藪嘉植日以親眷  
言江介品紛葩號南珍遇我好奇服移根得良因井井  
十畝園菁茆蔭澗濱縞裳擢玉質宜此空山春

始逃爨下厄復脫燎原焚結根園畝間炯炯臨水濱疏  
華照歲暮綠萼栖寶熏春陽挑杏繁鼎實獨已先遐情  
愜真賞來置我石田北枝散餘霞苔先生碧鮮

玄冬陽已復仙葩綴疏星隔浦映碧竹隨風墮寒燈我  
來刈薪蒸弛擔南山陁攀莖嗅清馥擷英嚼芳馨摻結  
灌木藂顏色無光熒彷徨未忍棄洗濯歸林亭

植爾當庭隅豈復資鼎味遷爾自谷中豈復相嫵媚冽  
冽玄冥候衆植各浮脆高標自凌寒孤尚獨冠歲么禽  
何處來飛下雙羽翠

田居二詩寄元叅議

積潦被原田瀦水滿陂塘具我錢鑄器剉稽飼牛腸周

垣無不完南東植桑桑欣欣條枝發向日欲奮張衆草  
還芊芊朝雉鳴陽岡始旦荷畚去取糞城邑傍敢辭作  
勞苦但願筋力強

上馬作將軍下馬作博士服賈真無良蓐食勤穡事王  
朝列公卿田稅豈十二同里相勞勉牛種更貸貫雖無  
凍餒憂未可悅親志親志在榮光祿養乃始貴為詩獻  
儒宗秋穫見稔歲

初日八首

初日照我樹我樹日華滋檀欒綠陰合四顧無曲枝盛  
暑熾煩歎其中有涼颼成林蔭千畝棲息任所宜

初日照我牆我牆無文巧周遮限奔逸環堵存屋隅聖  
譏糞土惡塗墍飾穢如畚鍤戒勞歌樂此生其樞

初日照我屋我屋受陽光寒暖順時令風雨謹蓋藏棟  
桷無文雕析一作析棟取材良聖亦善居室苟完斯為臧

初日照我書我書在東牖赫矣先聖言天地相永久秦  
火雖燎原其灰為世壽人文待茲成老死學敢後

初日照我田陂水方滿  
塍既欣穰禾發復愛嘉木榮  
伏膺獻酒食報賽歲事成  
告僕緩爾私先可輸王征

初日照我車我車不濡輪  
泥潦即不出旱復避埃塵  
當轅駕一馬宜彼原阻平  
下澤非所慕朱丹亦非情

初日照我池我池水波生  
芙蕖冒紅影黃盤蔭綠英  
龜魚相浮游鳴雛弄新聲  
雖無臺與榭足自娛幽情

初日照我衣我衣多賜服  
需哉富筐篚圖報命莫贖  
養病得退歸持此侈君祿  
茫茫宇宙內被體幾完足



飲田家

田家酒初熟邀予坐籬根我復不辭飲喧譁輒傾樽耳  
熱歌擊缶雜坐忘卑尊論古似嘲謔顛倒義與軒禮容  
或稍稍愛此情義敦丘原正春意歸路花柳繁翻翻鳥  
飛去悠悠寄情言

史館閒題 二首

騎馬到盡省冠佩趨几筵豈但文字美所樂長官賢京  
國足府寺金穀相百千飛書日雜還奔命思不先肅肅

館閣嚴操觚績簡編上有日月光下有草木妍森羅大  
象列俟此言語宣賽予昧儒學群髦辱官聯遭逢賴明  
世益喜身悠然

畫省真仙居華屋映丹樹青石倚闌干松髮沐雲霧綺  
疏刻連錢承塵畫翔鷺中有河漢文夜深室光聚玉函  
黃金鑰太史自侍御河上一豎儒伊吾誦章句偶趨彤  
庭詔詞林通天路雖樂文雅懿終慙紬繹誤

祖生求母

風塵知無歸海波知無還所以求母人見似涕已淚  
淚何時止得母始歡喜不見畎畝謠常言樂平世

題米孝廉詩卷

仲子或乃廉匡章或乃孝是非相失真百世每一道若  
人古君子二德夙所樂風聲苟不樹何以達民教記實  
有遷固雄辭蔚文豹坐可卜傳信高旻麗星皓

擬古 二首

長安青雲士任俠日娛游千金為人壽萬金買名謳小

金  
卷一  
舅拜郎官女壻恩澤侯出入意氣盛歡樂不知憂銀棹  
薦海品羊酪乞蒼頭生逢承平世死葬崑崙丘

早嫁金閨彥翡翠冠步搖纏臂七寶鈿繡袿襲鮫綃江  
南茉莉粉塗頰發年嬌專房妬夫壻奩錢媚神祆最恨  
蠶繅賤却恐鎖香銷

奉和王儀伯叅議龍門

衆鎮列方國茲山入叢霄隱雷鬱夜壑奔瀾劇春潮跋  
鼉不可升負鼉詎能超媧鍊役萬神禹鑿勞百僚我行

當晨興雞鳴馬蕭蕭歸馬見閭闔烟雲限紛囂所樂鎬  
京從敢賦淮南招摛辭造鵷行藻思芳年彫飲酒輒亦  
醉汎汎風鷗飄日畿芙蓉衢玉輶九天遙高咏青雲篇  
翹首扶桑朝

問燕

紫燕尾涎涎巢成引雛去秋風巢泥落燕去不知處明  
年春社時又來哺雛兒不問主人誰還可巢門楣

擬古 二首

日轂麗中天重陰受大光甫田溉以泉嘉谷岐稷芒莠  
質膺教益釋然達其良區區事文法河決拯土防  
驅車上疾坡六馬汗滿溝解航下急瀧百夫不能留微  
機有逆順無用卜筮謀車遲或可安航速或覆流

送別李彥方憲副之官

昔在翰林日與子同官聯出入文史間篇章雜朱玄飲  
酒學士家走馬大道邊各不識時貴浩氣超八埏今茲  
兩禿翁短髮咸被肩睽違諒不樂國憲屬持宣八州多

疲氓豪吏爭控拳擊搏并煦嫗所施務兼全期子上報  
政慰我心惓惓

登都北神山醉中題壁

過溪踏瑤瓊入山採蒼翠仙宮名神山下負六鼇背我  
來訪丹藥羽人已千歲清嘯響山谷幽姿媚松檜白水  
從北來南與衆川會開窓目沃野千峯儼相對自是山  
林樂何但官爵貴買田釀清泉里社日相慰詩成悵如  
失天風逼衣袂東望鄒衍廟盃酒可遠酹談天劇當時

古屋尚粉繪騎驢獨歸去人世空一喟

種桃

種桃南山麓三歲不得實種瓜東郊園擷之在百日豈  
不思遲暮終焉有常食如何種瑤草千歲始一獲

王繼學同張學士壽寧宮祠宿奉寄一首

永日坐虛館晏然有餘清迤邐違世囂冲融叶道情修  
管文賦成歌詩藻思生涼颼入書幌逍遙命觴酒披拂  
有庭花山石可擊拊下堦就步武布席思我友我友不



可思方與神仙期  
我我華陽巾左右  
委佩垂夜半登玄  
壇象緯光陸離  
天門倘有遇為我  
含景滋

送郭用可教授雲南郡

驛騎道邛笮拖舟絕牂牁  
西南古朱天徭俗雜奇譌  
輶餉仍雉鬻毛裳啗鱸羸  
良金飾長鍛翁季輒交劇  
官家善羈縻獠獍受捫摩  
君徃教其人為國揚餘波  
同文實同化萬里歸謳謠

潁郡

孤城介汝潁四野盡衍沃梁楚異風氣沉頓封域錯  
畝墳壤美宜我稼稻粟居民尚朴儉遺邦頗文物邈哉  
宋兩公當年擅高躅至今風月夜西湖有鳴玉竭來載  
淮舟登高恣遊瞩故老不可聞聲華竟誰續

昌平道中次繼學韻

清朝富文物冠蓋塞兩京角藝百技並論經千儒并下  
才忝供奉肅肅齋館清朝出都門道群山愜幽情聯鑣  
有髦士海內馳英聲白馬嘶南風羅袍映田塍笑我如


培塿自比山崢嶸


度居庸関次繼學韻

飛鞚陟雲巘決皆盡圖畫天氣吹高寒山雨洒長夏冥  
冥白鳥去寂寂松子下陸行石當塗水春泉繞舍高與  
蜀道齊深乃盤谷亞筍輿約重來羸馬苦常跨朋從咏  
連疊酬應給閒暇得見王子喬吾將驟鶴駕

石田文集卷一

謹案原序二頁後六行永古特舊作雍古今改後  
倣此





總校官庶吉士臣張能照

校對官中書臣潘奕雋

膳錄監生臣徐莊

欽定四庫全書薈要

集部  
石田文集卷二

詳校官助教臣謝登雋





欽定四庫全書薈要卷一萬六千二百九十七


集部

石田文集卷二

元 馬祖常 撰

七言古詩

題惠崇畫

  
龍門千尺梧桐樹多在石崖懸絕處上有古巢生鳳凰  
鳳凰臺高山水長吳蠶八繭白雲絲畫史落筆光陸離  
江天萬里莫射雁春草年年出湖岸

所過

張良廟前流水聲歌風臺下曉雞鳴行人舟中寐復起  
此生亦欲成功名白髮可憐升斗祿持歸不足求田屋  
揮杯看劍獨長嘯萬里朝雲見晴木

題商德符山水圖

曹南山君盡山水幅綃咫尺千萬里古木樛枝障霧雨  
蒼石斷裂蹲虎兕路幽應有仙人室樓閣恍惚雲氣入  
翰墨黯黯絕丹碧芙蓉峯高觀海日

淮安路池山

淮浦蒲花秋渺渺  
淮岸楊花春裊裊  
白魚初下酒船來  
十里風烟隔飛鳥  
吾生欲向淮安居  
更聞池山好田廬  
濯足滄浪箕踞坐  
不問朝家求聘車

湖北驛中偶成

江田稻花露始零  
浦中蓮子青  
復青楚船祠龍來買酒  
十幅蒲帆上洞庭  
羅衣薰香錢滿篋  
身是揚州販鹽客  
明年載米入長安  
妻封縣君身有官

李後主圖

澤國中寒歲年晏沙嶼潮痕明石棧風吹半樹野梅發  
天上書來問春雁江南後主丹鉛手盡盡冰絲世無有  
宮中長畫諫囊稀媚嫵吳娃雙進酒

寄鄉友

河邊老父念我出遠寄京華書一行謂言白髮今多少  
又報南園竹樹荒門前石田杭秣熟犢子新生走如鹿  
莫戀官家有俸錢長年作客身如束

送周南翁之官池陽

霏微桂藁綠霧深集仙書殿秋沉沉九華山影墮酒醺  
便欲起施青楓林青楓林高霜葉赤遙遙連雲雁行急  
蜀麻吳鹽來往時間坐城樓聽江笛

盡樹

寒槎偃塞風雨攻蟄龍嚙雲礧石根戰壘防秋鹿角柵  
長筏浮江下蜀門憶昔馳射古楚原夜觀野火燒楓林  
高堂醉酒看盡幅縹枝薜蘿牽我心

何仲博家棣韡堂

我有破屋近鳥巢水波春雲拂塘坳弟兄三年不得見  
屋前石田添竹梢眼前有此紫荊樹何時重過西州路  
欲瀉銀河下墨池盡寫狂歌滿華柱

宿興化縣界

去年七月淮水發獨乘扁舟觀禹跡今年七月天又雨  
躍馬南上閩嶺石蹉跎歲時身老大瑣瑣苟祿慚莫述  
白髮山中抱孔經會見青藜下天乙

再賡前韻

莆田颶風秋更發山寒天暮見虎跡夜起繞床聽簷溜  
又愁雲中龍出石我行閩南王事急文字豈為年位述  
每嗟莫救黔婁饑誓從方士祠太乙

題明皇端箭圖

寧王玉笛吹鳳凰桐花秋露宮晝長開元天子忽思武  
手中金箭照眼光何物群婢出後房羽林孤兒射殺將  
坐中凜凜無漁陽

題趙承旨枯木竹石圖

猗歟太史諸王孫生綃盡出崑崙根枯槎菌蠢厄野火  
淇園秋雨琅玕繁天寒歲暮碣石館囊書日見玄雲翻  
持向故山茅屋底倚看屈曲大江奔

閒題

客來散我床上書客去風吹忽成帙平生情思苦愛詩  
更喜坐嘯銷永日京都王門可曳裾鰲峰翠石相揶揄  
睡醒茶甌綠香滿誰能走馬汗揮珠

上京書懷



燕子泥融蘭葉短疊疊荷錢水初滿人家時節近端陽  
繡袂羅衫雙佩光共笑江南五雜組畫鷁浮波供角黍  
沙苑射柳追風駒古來北地為名區

室婦嘆

南陌日長春已半天風猶寒室婦嘆咄哉室婦爾何為  
卉衣廩粟充凍饑飽暖無憂樂以嬉乃此屢嘆將有私  
室婦涕泗言復咽食鮮袂良馬足說近聞官家販貧民  
雄保諸州已損一作捐瘠翁姑帶索行累累弱兒失爺夫

失妻哀號村空野樹槁。部屋見斗饑鼠啼。縣令具名報  
大府。星火符來應期聚。索錢買餅飼公卒。書券質田問  
鄰主。艱難憔悴不易狀。誰實為之俾無養。嗚呼吾人痛  
切膚。忍死莫作盜賊徒。君不見蒼鷹乳虎有司靡。何但  
歲凶人化鬼。

息齋風竹圖道士華山隱得之命予賦之

往年家住貧簞谷。丹鸞之實美如粟。玄雲翻空下深靚。  
昆吾寶刀削秋玉。石衣漬錦侵書光。風微粉墮生細香。

琳館瑤臺九天近夜寒笙磬聲鏘鏘萬斛蒼烟鬱江雨  
二妃彈瑟瀟湘浦郢筒蜀酒亦堪沽蟠石雙杖令誰取  
河朔歲晏冰為梁群木鱗皴臨雪霜遲汝狂飈莫吹裂  
截管他年侑帝觴

上京效李長吉

龍沙秋淺雲光薄盡羅宮衣侵曉着吳娃楚娘侍團扇  
象輿鳳輦明珠絡椒花染紫風雨香三十六盤天路長  
南都北都望行幸千秋萬歲迎君王

李夫人

未央天子香熏骨夫人不貯黃金屋水銅無光澁秋月  
留得當年舊蛾綠瑤臺夜佩聲闌珊沉雲叫雁沙泉寒  
二十五弦彈鳳凰玉釵小燕飛春山

祝丹陽祠武當

東窺禹穴西龍門狎虎豹兮觀魚龍中有武當神所宮  
捫摩光景憑雲風旁礪頰入厚地裂環視百鎮真叢叢  
丹陽道人紺髮古走馬北來致天語延祐天子聖明主

萬歲千秋作風雨

蔡州妓趙氏墜崖以死自誓作詩諷俗

鱗鱗汝水冰碧光汝之左右百草芳紅蘭紫桂媚長晝  
鉤輈鳥子回銀塘茭蒲無數菱葉小西家鞦韆屬年少  
燕泥霽雨風景酣簾箔依稀有歌筵趙氏女子邯鄲娼  
綵絲繡履踏春陽心思宛轉紫雲縷羞對兒郎唱鳳凰  
樂山嗟峨石生雨鄉人迎神奏歌舞婆婆起向神祠前  
祝願生身事針組野風吹目雙淚零泉聲松韻相泠泠

誰言女子情愛癖誓死命輕如鳥翎鳥翎飛上合歡樹  
開花夜夜無愁苦秋香不斷相思浦玉釵斷股埋黃土  
題織錦迴文圖

桃葉渡江不用楫織女烏鵲填河白合歡樹下宜男草  
草色不及羅裙好織錦度曲聲亦柔黃龍塞是契丹州  
夫君成歸定何日樂府陳娘歌第一

題簡天碧畫山水

西江隱君簡天碧醉來畫水復畫石春山秋樹綠更紅

木橋野屋橫且直煙雲翳鬱風雨交元氣淋漓障猶濕  
雪蓬夜宿魚尾舫晴蓑曉掛牛角帙岷關巫峽冬氣清  
猿嘯鳥啼天一尺老來看畫眼苦澀便擬買田溪水側  
脫去賜帶繫芒屐著書五車刻苔壁

秋意

銀床墜露下高桐竹練含冰留麝籠蒲萄酒作礪硃紅  
湘娥江邊採芙蓉月華流影天漢東素商淒清颺微風  
草根知秋有鳴蛩

寄家書

春雲閣雨花泥少池上波平飛白鳥  
薊中河外盡天涯  
蓮葉圓時身到家

五言律詩

春行南郊

綠樹連城合蒼藤入澗懸作橋分野路  
取竹縛溪船載酒誰留客看花我欲顛  
歌詩諧故老笑語屬神仙自鑿蒲萄井  
人開苜蓿田街櫻黃鳥哢窺藻白鷗翩  
狎坐欣



時俊隨行喜妙年山陰知寂寞春服且雲煙

固始縣南岳行祠

往歲曾登眺今朝又謾來山禽鳴獨樹石壁漬荒苔水  
淺沙痕亂天低雁影迴春風吹白髮有酒且銜杯

應制壽王少傅

皇極數多福臣工保壽耆提身名愈茂佚老眷殊彌  
廣金無幾祁奚子更奇堯樽沾露醴齊服剪冰絲几杖  
隨身到冠巾與野宜珊瑚生海石琥珀出松脂西掖清

光徧東朝寵渥私仁風初煦煦化日自遲遲宸詔徵歌  
曲仙音被樂詞乞言方有待莫去採靈芝

過文著作家

誰住街西屋文昌著作臣茶甌宜客靜書帙覺予親栽  
竹應棲鳳操觚定獲麟青藜明夜半北極動星辰

贈王待制

雪樹明街樾冰澌合御溝物華迎節換淑景拂天浮長  
日書封事經年問酒籌已知花塢好借汝獨重游

翰林書佐杜元美戲綵堂

聖代文明日時賢事業初雍雍封邑屋秩秩表田廬孝  
友歸今杜風流藉後予無詩歌陟岵有賦叙閒居夏閣  
搖紈扇春船捕錦魚又尋倉氏米還寫翰林書追陸重  
懷橘非溫笈絕裾五雲誇地近三釜喜身如我亦陳情  
者誰云捧檄歟強來親筆硯不去荷犂鉏大母頭疏白  
諸嬰口聚鸞薊中塋入路河外野沉游一作車  
又作草藝圃思  
傳業天門聽唱臚終慚老萊子欲語復蘧蒨

送文著作往鄂州諭南使

大化均天施皇圖象岳寧宣風依日月發號布雷霆貌  
虎嚴分鎮鵷鸞蔚在廷芝莖聯孔廟蓂葉茂堯庭珠米  
圓圓白樓桑箇箇青謳吟興隴畝游衍及郊坰楚俗那  
三戶滇童信六經已知含煦育復此仰儀刑使得皇華  
美歌應湛露聽賜衣裁錦段官醢應瑤筍上國崇懷服  
熙朝尚德馨魚書間粉蠹雞卜枉軺星鄂渚翔鸚鵡燕  
臺念鵲鷁歸途回四牡楓樹失江汀

送王眉叟真人

秋暉上寒竹白鶴立蒼苔石洞松花落雲房澗水來彈  
琴翻道曲搥藥應猿哀別浦迴船急孤山看早梅

送人之陝省幕和韻

綬帶驚沙鶴紗巾逐海鷗驪山泉未冷華岳樹先秋路  
出汾陽里衣仍晏子裘風流蓮幕羨君豈歎淹留

伯長內翰與繼學內翰聯句賦畫松詩清壯偉  
麗脩體諸家祖常實不能及後塵也仍作詩羨

之馬

吳綃冰絲白秦封石髮青沐華浮鶴露戢景蔽鶉星刻  
畫風雲狀雕鏤鳥獸形哦詩鏗玉署集句燦珠經熒熒  
舒光氣沉沉逐杳冥離歌三疊唱凱奏萬鐃聽肅穆官  
師位雍容樂舞庭江花春艷艷山竹雪亭亭自笑如塵  
俗懷慚似酒醒無因題琥珀有去對鷓鴣

都城栗氏玩芳亭

歲序催人老韶華逐酒濃開尊應數數閉戶豈重重花

朶山猿折齋厨竹筍供京塵衣不染猶得媚春容

春寒

春寒攢子瘦誰與念農耕地底多生暖天邊正要晴落  
梅栖雪暈裂竹見風聲為問催花鳥如何得使名

送蘓子寧赴嶺北省幕

雞塞鳴秋折龍沙列夜營賜衣俱魯縞給餉盡吳杭野  
井冰生夏寒天雪沒晴藩垣資贊畫幕府正知名

送劉侍儀祠祭北鎮暨無間

名鎮坤維左雄藩碣石邊宵明觀海日春媚袂河川塞  
道迷沙磧郵亭過玉田驢驢憐驛騎襪費羊毡亦有  
鮫人室應無鮪戶船山椒雲物異天角斗樞偏望羨祠  
官貴時清祀事專祝禧孚感格錫福待敷宣

謁告書懷

先子桐鄉地年來憶舊游山春花競發沙晚水閒流石  
屋青霞夜藤床碧樹秋防身龍具在強欲問吳鉤

贈彈琴道士



苦竹到階深雲房豈易尋倚松聞磬韻對石振塵襟芒  
屨玄壇曲瓊冠紫殿陰仙翁嫌我俗不肯坐彈琴

用韻贈王繼學時祠禱天寶宮

玄關松桂深長晝客來尋撫石雲生手弄泉風滿襟鶴  
巢連屋角蝸迹上碑陰須信祠官羨烹茶更鼓琴

送董仁甫之西臺幕

西南萬里地詔屬大行臺秦樹浮天去巴江帶雪來山  
河無用險邦國正須才臺幕風流羨書籤想盡一作開

送周南翁待制

雞曙辭宮漏，鷗天趣客船。  
帝書鸞紙瑩，母侍板輿鮮。  
林壑烟霞古，一作舊松楸雨露偏。  
儒臣文藻劇，隴表勒高阡。

華清宮故基

開元人物盡茲地，尚華清古道。  
風塵急，溫泉日夜生碑詞。  
惟石蘚宮樹有春鶯，過客知王建題詩不記名。

靈州

乍入西河地，歸心見夢餘。  
蒲萄憐酒美，苜蓿趁田居。  
少

婦能騎馬高年未識書清朝重農穀稍稍把犁鋤

宿遷縣

河伯朝宗日黃昏

一作塵

出岸高蛟龍分窟穴舟楫用波

濤使者修隄急田疇棄屋逃無錢誰貰汝歲晚更嗷嗷

呂梁

天府河流北徐方禹跡難青山開石峽白日看風湍星  
宿光芒合坤維脉絡蟠吳船牽百丈醺酒酌陰官

泗州塔

梵塔層層出雲間見象輪金光動淮水鐸語名川神負  
載坤多力莊嚴佛有因埏陶千萬億穹石刻銘新

舟中

藂薄縈雲曲岡巒引霧深舟輕風燕疾衣薄水螢侵夜  
久江喧瀨秋清竹滿林閒情任飄泊到處欲登臨

徐州弔蘓眉山

城角黃樓壯蘓公骨已仙亂流無噉石宅土有居屢才  
大為時忌名高得世傳舟中卧讀賦臨水一琅然

挽饒國吳公

泣雨纏丹旒靈風攪素帷  
番君歸廟日饒國表阡時  
穹石鑱仙籙華編綴誄辭  
山原松漏月墓道標生芝  
諧世資清福全天樂壽耆  
孫聯書殿列兕侍竹宮祠  
執紼嗟何及居廬願莫私  
明王崇秩祀歛錫待敷施

送郭巨卿之南臺

臺府濤江外官清吏報稀  
印朱塗野靄研瀋滴山霏  
列鎮幽明入方州殿最歸  
羨君高步穩悔我棄荷衣

送王伯弘平章

袞職華蟲絜台階象緯明世須先穀帛治理後章程所  
貴求儒効何勞得論衡退公無候吏飲介有諸生楓陛  
都俞密槐庭屬望清助耕千畝籍謝絕五侯鯖疏傳專  
高節韋賢擅令名臣工商相重鄉國魯公榮汶水春疏  
疏一作流鮪徂松夏嘯鶯來宜思舜慕去合體堯情尚醞隨  
飛騎宮衣滿賜籛曹裝應再趣莫擬種黃精

送侯廣彥秀才

淮水清無石君行去路賒分金知鮑叔問字見侯芭雲  
滿山遮路天高雨送霞士貧方傲世白髮豈多嗟

秦元卿家慶圖

天爵榮良貴皇家錫顯封恩光依上國寵渥蔭華宗椿  
悅荆交艷萱妍桂競穠園亭春掩映桑野畝橫縱令子  
官薇省諸孤胄辟雍儒功誰表率善俗此儀容

辛良史披沙集詩

未可披沙揀黃金抵自多悠悠今古意落落短長歌秋

塞鳴霜鎧春房剪畫羅吟邊變餘髮蕭颯是陰何

海子橋 二首

朝馬秋塵急天潢晚鏡舒影圓雲度鳥波靜藻依魚石  
棧通星漢銀河落水渠無人洗寒露為我媚芙蕖

南望蓬萊觀行人隔苑牆有時馴象浴不見狎鷗翔宮  
樹飄秋葉江船認石梁辟雍真可作擬賦獻文王

秋谷平章生日

上宰儒宗重中台位望隆承天施塊圪捧日照瞳朧汾



洛精靈合文章運會通鄼侯初亦

一作生兆

昂周翰降維嵩

姬正逢陽復義車舍斗中眉毫齊紺髮仙骨烟方瞳鸞  
鳳翔千仞貂蟬侍兩宮天池浮畫鷁公袞煥華蟲造命  
毗元化書思沃帝聰山河尊社稷禮樂賴臣工韓國蕃  
宣永高皇報施崇從來黃閣貴只屬紫芝翁檻竹沉沉  
翠庭花灼灼紅道山藏畫象詞館轉詩筒洛下耆英盛  
人間壽域同君王自養老何羨菊潭東

送李元章之陝縣

元章舊官太常

周漢風流地郎官出宰年憂民思罄折去國想官

疑作官

懸種樹連關古栽花近洛川莫嫌齋馬瘦春雨便行田

送符鎮撫之官

金符傳拜將白羽看麾軍吹角弓橫月開旗馬望雲舊  
家書盡讀新府令初聞油幕風流盛吾歸詫隱君

題仇公度所藏先世家訓手澤

斗南人物論仇氏爾為先燦燦文華在綿綿世美傳庭  
趨元獵較祿養有圭田感慕吾親志臨書淚迸泉

泉南孫氏園亭

鑿石通歸汐浮梁看浴暎鴨欄萍上愁鹿柵蘚生垣簷  
蔔垂梔子簣簣長竹孫書香芸辟蠹席煖錦栽鷄交客  
登仙籍承家荷帝恩冰甌蜂蜜溜酒榼荔漿翻吹簫花  
園屋彈琴鶴舞園海雲春有態閩雪夜無痕誰謂衣裳  
懶予今杖屨煩捋鬚歌月地翹首望天門

贈里人別因寄祖義祖烈

萬里天南地逢君似到鄉欲同觀海嶼忽別上河梁楚

樹思題葉淮僧憶借航歸時報兄弟莫遣石田荒

再從浙入閩 二首

江外淹留久那堪去復回水生客星瀨日出偃王臺  
竈茶甌至筠籠橘顆來春雲又成雨著意落寒梅

積雨閩河濕今朝日始晴浮船下夜瀨覓酒近春城  
鷺鴨將雛出牛羊傍母行獨憐無似客萬里又南征

送光州陳仲禮知州任滿北上

太守官仍貴王畿路豈賒歌驪君獨喜繫馬我興嗟  
髦

士應朝請群公論汝嘉送行無酒榼歸去有書車魯望  
雲浮樹淮空雨斷霞雁來猶為稻鷺下獨憐沙宗器知  
瑚璉祥金未鑄鄧漢庭須賈誼揚宅失侯芭涉歷川塗  
異游觀景物華秋風河漢側被髮泛靈槎

次元禮弟韻

白鶴愛苦竹婆娑正爾嘉田居門近水野飯甌炊霞自  
種千章木誰乘萬里槎小亭燒藥處依約是仙家

送人自淮南賣田還江陵

楚國方城外江陵漢水邊俊才多顯達高士亦留連濟  
濟夫君美栖栖獨爾憐如何無紫橐尚此有紅蓮歸覓  
千頭橘行荒二頃田相逢還又別春水看浮船

謝紙

長夏身無事煎茶被竹練官清還食祿俸厚欲收書揖  
客談玄理逢人問故居不因舒道士無紙寫拼攔

遊華嚴寺

化國日遲遲招提獨往時鶴馴看梵磬猫定護齋糜貝

葉翻經譯沙墻應制詩庭前雙樹好長夏得風吹

次韻繼學

三首

金爵層霄外銀猊曲檻邊含香俱國士持橐半神仙豈  
有遮塵手應無見麴涎池清天似水席煖罽如綿客送  
蒲萄酒人分苜蓿田書思超豹省揆藻賦龍船

時上京  
自大都

移舟  
至誰念馮唐老為郎白首年

雞塞西寧外龍沙北極邊有天皆入貢無地不生仙鵲  
玉光含水驪珠濕帶涎香清堪閉閣衣薄豈勝綿珥筆

遊鰲禁扶犁占鶴田酒來揚子宅人上剡溪船自信篇  
章貴能歌擊壤年

丞相晨趨漏元戎夜拓邊碧雞崇漢時丹藥監秦仙敢  
謂鰲頭選初逃虎口涎柳詞方濯錦雪賦已抽綿艷艷  
金為屋輝輝玉滿田客衣隨楚製鄉夢逐吳船所賴三  
階正螭坳記有年

陪可用中議祠星於天寶宮

教命司諸席元辰集醮筵星君符介壽歲紀輯安躔炬



焰天無夜熏焚樹有烟音如綬嶺上拜似竹宮前藥笈  
祥延世飈輪儼御仙日餘青煒接宿耀罽壇連象緯昭  
重潤齋明祝大年步虛垂珮響奠幣織文鮮誠感將馨  
祀神娛樂鼓淵蕃釐歸帝胄享祐播農田

崇真宮西梨花

春日梨花下相逢把臂行香痕憐粉白酒暈惜紅輕影  
動簾穿燕聲來樹度鶯共當拚一醉莫待鬢華生

明日在羅中官園池次韻

帝里春光媚花前可獨行額黃團帶小眉綠畫痕輕蕩  
槳波浮鷁裁衣粉妬鶯却愁風信惡明日樹生陰

送可升法師祠武當山

華芝三曲蓋靈馭九龍車人喜仙官至誰云帝闕賒山  
神驅黑虎真侶耀朱蛇石髮松膏霧天衣雨織霞澗青  
春舞藻岩紫晝垂花醺席羅星斗賓筵競鼓笳乘槎過  
博望噉酒問樂巴竭澤無魚畧施達有兔置熙熙歸化  
域遲汝報重華

送楊仲禮江淞提舉儒學

江海雄南服，衣冠重北門。  
仗雲移振鷺，船霧送翔鶴。  
酒屢招人飲，文多與客論。  
名高依日月，道大信乾坤。  
官拜儒臺貴，班聯會府尊。  
齋廚還筍蕨，賓所盡蘭蓀。  
佐吏言猶雅，公庭禮不煩。  
過家懽上塚，去國戀承恩。  
田隸觀魚子，隣塲撫竹孫。  
光榮休負弩，歌鼓樂鄉村。

武當山道士贈行

幽居鑿石楹，仙路接青城。  
印字苔行鶴，校金樹度鶯。  
飛

光無短景上壽有長生星斗何曾闇玄壇夜夜明

詹得之慶母壽十韻

壽域資皇極天樞夾泰階樂生黃髮並錫福白眉皆有  
母禕裁副因兕綬結綢高年方宴賜偕老屢興懷承祀  
言供食延賓使賣釵輦絲猶故物彤管賴吾儕蘭茁矜  
熊枕花明藉鹿柴學書圖史脩贄禮束修差予欲登堂  
拜誰令出旆諧歌詩陳善慶勒字擬磨崖

盧師山下過郝景文叅政墓

故相聲名遠荒阡松栢長地能終不夜天莫借飛光舊  
客驅車過新詩灑淚傷千年此山下樵牧禁牛羊

送史正翁經歷之嘉興

京華春滿眼楚客榜船歸花送行衣舞鶯從上苑飛尊  
鱸隨俸入桑苧接田肥鈴閣文書少還知小吏稀

姚左司墨竹為賈仲章尚書賦十韻

江渚春生雨山楹夜宿雲籜鱗穿石錦節粉帶書云玄  
玉昆刀削素絲并剪分魚竿方問野鳳管已相一作招君

莫作宣房捷還歌華澤文露零忻鶴警星度恐螢焚影  
似風櫺見聲如雪幌聞裁冠終有製作屋更無氛移植  
驚燕叟盤根識楚坛中郎揮墨汁宗伯侑鑪熏

許右丞醮道士祈感應

禁門先赤幘索室借黃冠箋奏冷風至符飛苦雨乾市  
舡難繫買禾耳可芟刈朝薦祈年觀昏祠太乙壇嘉生  
資五福哀籲劇三盤魚鼈還陰宅蛟龍謝夏官金穰夸  
浩浩粒食且搏搏神享希羞蕙靈歸藉用蘭車輪非有

角馬足忽生翰帝念愚眚病民歌法網寬祝祠期不繆  
相國寸心丹

送許誠夫太監祠海上諸神

上聖崇明祀元臣屬有文內香開寶炷制幣出玄纁授  
節臨前殿傳臚聽後軍酒清黃木廟魚祭武夷君颶母  
應回雨天妃却下雲不勞風有隧猶願楚無氛漕粟琅  
琊見還珠合浦聞穹蒼天塊漭溟渤氣網緼龍戶編魚  
賦鮫人織霧紋時祠光炯炯宣室語欣欣鵬運連番舶

軺歸願與群觀書曾拜洛歌賦不橫汾越水琉璃靜閩  
花茉莉熏伏波封莫請宵旰念華勛

次韻阿榮

目錄作崇

叅政

輦路青雲上居人杳靄間寺鐘聞下界車轍在高山倚  
馬才名世鳴雞客過關黃陂隔淮浦歲晚約同閒

元禮弟寄和韻

野雲不肯出作雨漲山溪頗謂談捫虱何如學祝雞鑿  
池通竹遠插架度書低秫熟秋田後應知酒自攜



適意

夢想蒼龍闕盤桓汝水濱  
郡侯偏愛客秋雨更留人  
饌盛嘗鱸膾樽空倒角巾  
羈愁不能遣爭奈二毛新

贊御書雪林二字為趙伯寧中丞作

聖主敷文化臺臣得寶書  
方負河洛出次舍日星居  
禹畫州圻古義文物象初  
克勤資負辰躋敬賴儲胥  
王錫非輦帶天光豈器車  
傳家恩有渥訓德義無餘  
浩浩水華潔亭亭木本疎  
山輝因玉潤雲氣是龍嘘  
瑩爽才尤

峻栽培力不虛明良須慶會動植樂舒徐  
春遇榮金匱謳歌媿石渠賤微叨下列瞻拜舞階除

張元傑祠龍虎武當

岌業芙蓉闕歲蕤翡翠幢祠官天北下仙屬日南降香  
雨沾春隴靈風鼓夜江神來乘馬四使至戴旗雙宣室  
還因鬼箕疇却為邦玄君明月珮玉女白雲窓淑氣非  
烟縷祥光豈燭缸兩山通地脉萬竇響泉淙有樹皆生  
酒無苗不闕龜蛇龍虎地蟠螭好為砭

求趙伯顯畫家山圖用唐李中韻

春雁南來後家書一紙無山花應向日陂水計通湖  
羸特衣資絮生蠶薄藉蘆久宜拂白石強此伏青蒲  
琴客分抄譜仙翁許借壺園紅榴火鍊沼綠芡盤鋪  
嵐氣飄簷隙烟光鬱座隅呼雲橫蟬竦問月看蟾蜍  
倚杖心何逸觀魚興不辜新開竹林逕并乞寫成圖

猗綠園

殖產吾何取開林我獨能縛船嘗取竹擣紙每移藤池

曲波濤小花繁霧雨蒸春雲同礎潤秋月共江澄鳳下  
非因食魚來不可曾寫經還道士裹飯乞行僧筍屨新  
青折荷衣舊翠凝浮甌茶有乳溢甕酒無冰香地留文  
篆書囊剩繚綾清晨食玉罷東坐日初升

贈蘆州黃孝子

我家淮水上孝義風多聞邑屋封華表丘園聘束纁久  
嗟毛義檄更嘆董生文白石山中去吾將問隱君

雲巢道士

弱水不容舸仙山本負鰲坊偏朝斗柄材或伐蟠桃網  
戶春絲密梁河夕竦高點金應有藥切玉豈無刀雨裏  
攀龍鬣風中拾鳳毛露珠凝藥臼霞纈暈綃袍箕尾人  
能遇靈槎客每遭隔塵勞夢想斥鷃在蓬蒿

出都

長城懷古處身在日華東水出盧龍塞山連碣石宮沙  
鷗終自白霜樹忽然紅雲海鴻濛氣歸颿杳靄中

項子虛鍊師歸舊隱

黃石書難遇青精飯易逢山中霞盡碧海上日偏紅舊  
種三珠樹新栽五粒松大年能駐景上藥可還童塵隔  
悲浮世仙成劇化工龍來寧有穴鶴放更無籠衣製波  
紋穀琴修火爆桐綠章飛洞府藥笈奏神宮默默龜潛  
息憧憧蟻聞聰鍊形吾體惡因爾問崆峒

題惠崇畫樹林

下瀨生秋響平林漏曙光蜀橙陰十畝閩荔熟千房不  
聽樵夫伐無勞匠石傷靈槎上天漢全棟架明堂黯黯

雲垂幔霖霖雨濕墻雁奴呼伴審鳩婦擇棲詳路遠逢  
仙宅天低近帝鄉春行苔履滑夕坐筍書香東綃刀誰  
剪西園價爾償懸車清渭後白髮洒蒼涼

虞伯生學士畫像

韋相傳經業楊門世講官箕裘君自得文字我知難汲  
冢朱塗誤秦灰墨補殘黃流凝玉瓚仙露滴金盤不肯  
投漫刺偏宜戴小冠近林聽竹雨臨澗看風湍詔入蒲  
輪軟訶歸釣石團青山連古國白日照長安擬卜龜呈

北將書鶴借翰風  
流圖畫裏方自見神完

登雨花臺

積翠生層巘  
凝光浴巨濤  
吳城花覆井  
楚舸竹裁篙  
地近魚龍逼  
天空鵲鶴高  
野橋皆蟬蛩  
溪水盡蒲萄  
雨石逢芝箭  
風林得鳳毛  
胭脂兒女小  
罨畫鬼神饕  
六代都銜壁  
三山尚戴鰲  
故宮猶在苒  
古樹漫周遭  
仙洞歌瑤草  
人家宴碧桃  
飯香非接浙  
酒好不芻糟  
綠霧春連閣  
丹霞曉映袍  
攀躋忻境勝  
跋涉憚人勞  
老我才還劣  
清



資媿重叨採詩今有使問俗似無曾佳麗千年最聲名  
一世豪歲時休澣日攜手可遊遨

南野

南野新亭好城坳築小丘飄花如

一作迷

虎落

一作穴

過水

識龍舟朝士尋山到隣翁載酒游五雲天  
塊漭書帙瑞光浮

紫芝不用事

霞纈盤華盖天葩擢喬雲孕靈非有種  
揆藻忽成文冠

蠡仙裁羽纓垂女製裙原田多衆草獨爾擅網緼

贈楊洞天道士

我自不入俗君今又欲仙鳥啼百花裏屋住萬山邊密  
樹雲難過空潭月易圓題詩秋卷了為說小行年

五言 九首

太行東北去形勢自天分一葦航吳越千車輓朔雲衣  
冠今復盛豪傑古猶聞欲獻三都賦茫然愧不聞

不作還山夢因吟李杜詩平生無飽飯抵死只憂時事

實兼唐史風流揖楚辭山川舊遊處千載有餘悲

王子不耐俗還山應恐遲挑燈同此夜把臂憶當時愛  
我常懸榻逢人只語詩買田今已訣莫負耦耕期  
好去春山路騎驢罨畫中徜徉紫芝客憔悴鹿皮翁得  
酒寧辭醉逢人莫語窮乾坤皆古意人自不相同

御史青驄馬詞臣白玉堂有才皆展驥此老尚亡羊雲  
海迷舟路天風失雁行不須愁白髮正欲媚幽光

古意在眉宇新詩應口哦無錢賒酒得有屋喜人過字

宙千年事功名一曲歌執鞭吾亦可稅駕欲如何

聞道光山縣城南十里賒人家依翠竹野水亂梅花應  
有仙燒藥寧無客艤槎行當問田畝結屋貯烟霞

栽竹復栽花居然處士家有田供白飯無句詠青霞春  
雨浮隣甕秋船繫樹槎漁樵相見熟來聽讀南華

又是蒺藜秋浮槎繫旅輶古城空石堞平野半沙丘自  
笑滄洲客還期汗漫遊明朝入衛國淇上買扁舟

題張良卿御史乃翁萬戶死邊詩卷

莫恨將軍死將軍死是身子今簪獬豸國擬畫麒麟銅  
柱聲名舊燕然記刻新叢祠寄江右百世衛邦人

春思調王脩撰袁待制

二首

翰林王學士宅裏好花開白紵裁春服青錢喚酒杯終  
知老子興嘗望美人來笑我如椎鈍敲門一百回

京國春風軟名園花信來只愁添酒價還恐負詩才繡  
袂鞦韆下銀鞍腰裏回詞臣應自貴深院閉莓苔

再用韻奉繼學

二首

修撰官清切高齋不易開青鳬憎綠幘黑瀋覆瓊杯  
日裁書出年年賜錦來最憐山簡拙惟有習池回

山東豪俠客走馬西京來芹藻流清譽絲綸藉美才  
但能鈴索靜還使酒船回夢想庭前鶴竒蹤篆紫苔

次韻咏石

老石何年有依稀滿路旁無人愁飲羽有客坐亡羊  
戒世能言晉傳書豈姓黃補天成五色何獨柱明堂

北行

山轉疑無路溪深似有雲衣裳沾沆瀣鞍馬入氤氲  
樹花凝畫崖藤蔓駐矐佛宮金匝匝帳屋錦文文塵坐  
車爭出霞舒騎亂分烟中聽犬吠天畔見人耘草檄期  
誅泚歌詩擬弔蕢家家收棗栗處處種榆枌枕有仙人  
記琴無山鬼聞時巡勞聖主靈會召神君泉脉流釵股  
松身鏤纈紋團團留象跡矗矗立馳群龍虎盤南石貌  
貅鎮北軍井鹽仍皛皛馬酒亦醺醺越貢珠璣錯夷琛  
翠羽紛弓旌徵隱逸斧鉞賜功勲俗已多羊酪民還賤

豕獮雨餘雷茵長秋入地椒芬井邑聯山海倉箱溢隴  
汾白鷹隨雪雁黃鼠掘田鼯太祖初飛御中原正溺焚  
劍光明塞道箭影落窰氛聖嗣開元極天聲震大贛轅  
門方納禹國鏡又收負降主來啣璧奔君自束縕只今  
修拘簾何但去輓轅公子衣縫掖王妃曳練裙期綿堯  
歷祚物阜舜風薰學士工謨訓成均載典墳小臣難頌  
德祇合採書芸

送同年趙繼清尹安陸



席帽文場裏於今十七年白鬚俱滿鏡墨綬獨行田鵝  
翼知吾刺鸞棲覺汝賢高才多晚達未可嘆迍邅

寄舒真人

金闕來華蓋琳壇集羽衣石因鍾乳膩松為茯苓肥劑  
墨香翻杵修琴玉布徽天低臨象緯日近逼光輝竹裏  
開長逕池邊蔽小扉紅迷霞綺錯綠漲水環圍仙杏葩  
凝赤蟠桃萼剪緋龍來還獨宿鶴去更知歸割蜜蜂先  
避銜書鳳自飛祠雷陳古磬符鬼掣靈旂丹井泉偏冽

銅盤露未晞俗人那得識詩客盡相依  
伊我逢休澣從茲咏浴沂憑師消鄙吝  
猶可採山薇

送華山隱之宗陽宮

江閣魚龍近山房霧雨多地清天不暑  
池曲水無波筍簪迎書帶櫻桃送錦窠  
呦呼伴鹿嗷嗷換經鵝養素行編屨  
乘閒坐織蓑幾篇食玉法一帙醺星科  
香爇沉銀葉衣裾佩紫荷丹光留海月  
絳景出松蘿醉憶泉浮乳幽憐石爛柯  
神君攀綠桂天女踏青莎邀客登山頂

尋真入澗阿洞簫吹道曲雲紙寫魚歌予髮今如此君  
心可奈何高壇見明月為我問娑羅

石田山居

八首

甲子人愁雨河田麥已丹歲凶捐瘠衆天遠禱祠難賈  
客還沽酒王孫自飽食更憐鰥面黑征戍出桑乾  
積雨衣裳濕愁人是麥田泥將深沒馬霧欲墮飛鳶  
火勞薪盡家居老屋穿墻根雜蛙蚓擬買繫籬船  
光山楓製錦潢浦荻飛綿秫熟何論酒魚來不計錢卜

鄰多野老求藥有神仙為客留羹筍清晨步石田

四月淮天雨清林蔭碧池筍香隣甕酒禽響一作聽客窓

棋田鼓春迎社鄉巫夜賽祠漸知飄泊久自覺是農師

無麥夫何極吾憂隴畝空豈能驅盜賊得忍鬻兒童茶

蓼充腸熟樵蘓救口窮無端縣小吏召役到疲癯

作客何多意淮南即是家自牽蘿屋小不正葛巾斜書

嬾眠尤熟詩來酒更賒春天雲嫵媚相對坐鷗沙

竟日無賓主山房一禿翁竹光浮畫碧花蘂颺春紅田

父分雞桀

一作  
冊

隣僧乞鶴籠時行親杖屨未覺坐書空

淮南窮僻地先世有林廬花曙鳴山鳥芹春躍岸魚鼓  
琴仙度曲種杏客傳書朋舊如相覓休嗔禮法疎

郎中蘓公哀挽

墓門翁仲泣秋草九原深身世書盈屋鄉園樹滿林故  
人多執紼令子早冠簪曾作陽關曲今成薤露吟


古城熊公壽考

高年開八袞治世遇千祺馥郁蘭當砌歲蕤菊滿籬子

能知負米孫更喜含飴但願雍熙內吾民盡耄暮

期一作

石田文集卷二



總校官庶吉士臣張能照

校對官中書臣潘奕雋

謄錄監生臣徐莊